



PAulus natione Germanus, literarum desiderio sese Lypsiam in Academiam contulit, atque diligentem operam literis nauavit. Itaque factum ut in Philosophia, & humanioribus literis ipsa quoque Theologia magnum nomen acquisierit. Erat enim optima indole & rara eruditione praeditus. Itaque procerum consensu eius scholae professor publicus assumptus fuit. Ibi docendo & scribendo sibi & Gymnasio Lypsenfi magnam auctoritatem comparauit. Scripsit is pro tyronibus literarum, de Institutione Latini sermonis, atque colores Rhetorices. praeterea rationem conscribendarum Epistolarum, cum multis alijs, quibus iuuentuti mirum in modum profuit. Unde ab omnibus eius loci hominibus plurimum dilectus fuit, circa annum Christi 1495. Trit.